

Mapabaxutoje San Pablo toyaquina Filpos tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi,
Filpos tomarapijivijavabelia, pamatacabí naneconitsia
ponapona penaneconitsivi pejebabiabibota yabara pelivaisi

1 ¹Xanë Pablónë, Timoteobeje, Jesucristo papijajivitonénëbeje.
Pacatoyaquinatsibeje mapabaxutoje padaxitamë paFilpos tomarapi-
jivimë, Jesucristo pelivaisi panejumecovënëtavanapaevi. Paancianovimë,
paxamë ata padiaconovimë, pacatoyaquinatsibeje. ²Pacatovajëtatsibeje
vaxa Diosojavabelia, vajatuxanenë Jesucristojavabelia ata, papecaitaxuto-
tsioniataenexa jamatabëcuenexanepanaeya panejinavanapaenexa.

Pacuenia Pablo Diosojavabelia tovajëta Jesucristo
pelivaisi pejumecovënëtsivi yabara pelivaisi

³ Itsa pacanajamatbabenapitatsi Diosojavabelia tavajëtsijavata, jumai-
tsinë tsabiabi Diosojavabelia: “Xaniavaetsia yavenonabiabame nijajivi,
Filpos tomarapijivi,” janë tsabiabi Diosojavabelia paxamë yabara. ⁴Itsa
vajëtajë Diosojavabelia, nexata pacatovajëtabiabatsi jamatabëcuenabarë-
yaya. ⁵Bajarapacuenia pacatovajëtabiabatsi tsipaji Dioso pejumelivaisi,
pexanialivaisi, panejumecovënëtsijavaveliacujinae, paneyavenonabia-
bame tanamatavenonaejavaxi yabara. Patsipaebabiabamenua Jesucristo
pelivaisi itsamonaejavabelia. ⁶Yapëtaniji baja cajena pacuenia Dioso
pacayavenonaejitsia bitso pexaniajamatabëcuene panexainavanapaene-
xa. Tsipaji baja Dioso taxuxuaba papecajamatbabëcuene xanepanaeyae-
xanaenexa. Bajaraxuata panevajënaeyabelia Dioso pacajamatbabëcuene
xanepanaeyaxanaponaena copatsinejeva matapania Jesucristo icatsia
pepatsimatacabitsicajavabelianexa. ⁷Bajarapacuenia paxamë patacas-
vanajamatbabëxainaejava, netsitaxanepana. Tsipaji bitso pacasivatsi.
Pamatacabí naneconitsiaponapajë penaneconitsivi pejebabiabibota,

panejamatabëcuneyavenoname. Panejamatabëcuneyavenonamenua pamatacabí nacuaevetsivi pitabarata nenuta Jesucristo pelivaisi jivi tatsipaebaponaëjava yabara. Nexata bajarapamatocabí jumaitsinë bajarapamonaejavabelia: “Mara palivaisije, Jesucristo pelivaisi, pexaniajailivaisi cajena jivi pecapanepaelivaisinexatsi Diosojavabelia,” janë nacuaevetsivijavabelia.⁸ Dioso cajena nejamatabëcuneyapëtane pacuenia bitso paxamë pacasivatsi. Jesucristo neyavenona bitso patacasivanexa.

⁹ Pacatovajétatsi Diosojavabelia itsamonaë ata bitso paneasivatsavana-paenexa panevajënaeyabelia. Pacatovajétatsinua paneyapëtaenexa Dioso. Pacatovajétatsinua paneyapëtaenexa xua Dioso pacatojitsipa paneexanavanapaenexa.¹⁰ Nexata payapëtaename paneitapetsinexa palivaisi bitso xanepana daxitalivaisivecua, panejumecovënëtsinexa bajarapalivaisi. Nexata bajarapacuenia pacacaëjëpaena xaniavaetsia panejinavana-paenexa aneconijibia. Matapania Jesucristo icatsia pepatsimatacabitsicajavabelianexa, bajarapacuenia panaevetavanapaenexa.

¹¹ Nexata épexaniajamatabëcuene paxainaenamne panejamatabëthëtojavavetsina Jesucristo papijajivixaemë. Nexata itsamonaë paxamë yabara jamatabëjumaitsi tsane Diosojavabelia: “Diosomë, ayajamatabëcuenenëmë bitso. Pexaniacuene bitso toexaname Filipos tomarapijivi épexaniajamatabëcuene pexainaenexa pejamatabëthëtota,” jamatabëjai tsane itsamonaë Diosojavabelia paxamë xaniavaetsia panesitajinavanapaexae.

Pacuenia Pablo jumecovënëtaponapona Cristo yabara pelivaisi

¹² Tajamonaë, payapëtaneme rabaja pajamatabëcuene yabara nanecontsia ponaponajë penanconitsivi pejebabiabibota. Jitsipajë paneyapëtaenexa mapacueneje. Majotaje penanconitsivi pejebabiabibota neeta pexanialivaisi, Jesucristo pelivaisi, jivi tatsipaebaponaexae. Xanë neetsi ata penanconitsivi pejebabiabibota, itsiata apo yacaranatsicapanepae pexanialivaisi, Jesucristo pelivaisi, peyacaëjëponaenexa daxitanacuanëjava. Nexata baja aeconoxae bajarapalivaisi pevajënaeyabelia yacaëjëpona daxitanacuanëjava daxitajivi Diosojavabelia pecapanepaenexatsi.

¹³ Nacuaevetsinë pijabopijivi, vajabitsaë, daxita itsamonaë ata, neyapëtane majota naneconitsia taponaponaëjava Jesucristo pijajivitonëxaenë.¹⁴ Mapatomarataje ayaubitsaëtoxaneto Dioso pejumecovënëtsivi, itsa nevënëtane tananeconitsiaponaponaëjava, najamatabëcuenesaëtavanapa. Diosojavabelia asaëyata najamatabëcuencopaba peyaveno-naenexatsi. Nexata ajumejunavijibia Dioso pejumelivaisi tsipaebapona itsamonaëjavabelia.

¹⁵ Pamonaë ajumejunavijibia Dioso pejumelivaisi tsipaebapona itsamonaëjavabelia, bajarapamonaeyajuvënëvi, panecuenecaëba. Nexata itsamonaëjavabelia asaëya tsipaebapona Cristo pelivaisi. Bajarapamonaë xanë yabara jamatabëjumaitsi: “Pablo bitso ayaicuenia Dioso pejumelivaisi jivi

nacatsutsipaebapona. Pacuenia bajaraponë tsipaebapona, matatoxene-tsia vaxaitsi tsipaebaponaenatsi jivi vajanacayaiyataenexa,” jamatabëjai bajarapamona. Itsiata itsamona, bajarapamonaeyajuvënëvi, taneyavenonaenexa, itsamonaejavabelia tsipaebapona Cristo pelivaisi bajarapamona atá xaniavaetsia pejumecovënëtsinexa.¹⁶⁻¹⁷ Itsamona tsipaebapona Cristo pelivaisi pejumetaevitsi saya peyaiyataenexatsi, pepënponaene-xatsinua. Bajarapamona pejamatabëéthëtovetsina apo jumecovënëtsi atá Cristo, saya jema Cristo pelivaisi tsipaebapona. Jamatabëjumaitsi: “Vecae Pablo naneconitsiaponapae penaneconitsivi pejebabiabibota, pecovëta itsajamatabëcuene xainaeyaexanaenatsi Cristo pelivaisi pejumecovënëtsivi. Bajarapacuenia Pablo jamatabëcuenebëjaiyaexanaenatsi,” jamatabëjai bajarapamona xanë yabara. Itsiata itsamona xaniavaetsia tsipaebapona Cristo pelivaisi pejumecovënëtsixae Cristo. Bajarapamona yapëtane Dioso tanetocopatsijava penaneconitsivi pejebabiabibota naneconitsia taponaponaejavata, tajumaitsijavanexa nacuaevertsivijavabelia mapacueniaje: “Jesucristo pelivaisi jivi pecapanepaelivaisinexatsi, pexaniajailvaisei cajena,” tajaijavanexa nacuaevertsivijavabelia, bajarapamona yapëtane.¹⁸ Majotaje nenanconitsiaexanae atá, apo natsinajamatabëxainaenë. Itsamona pejamatabëéthëtovetsina Cristo pelivaisi pejumecovënëtsixae, tsipaebapona jivi pejumecovënëtsinexa bajarapalivaisi. Itsamona pijinia pejamatabëéthëtovetsina apo jumecovënëtsi atá, itsiata Cristo pelivaisi tsipaebapona jivi pejumecovënëtsinexa bajarapalivaisi. Bajaraxuata bajarapamona atá jivi petsipaebaponaejava yabara, itsiata sivajamatabëcuenebarëyanë.

Bitso orijibia tavajënaeyabelia jamatabëcuenebarëyanë tsaponaetsane.¹⁹ Tcipaji yapëtaniji pacuenia panetovajëtaponame Diosojavabelia. Espíritu Santo, ponë Jesucristo itorobica, bajaraponë neyavenonapona. Bajaraxuata yapëtaniji daxita pacuenia netoxanepanaejitsia. Nexata baja pitsapaenajë tananeconitsia ponaponaejavavecua.²⁰ Bitso jitsipajë épe-xaniacuene taexanaenexa. Apo jitsipaenë taexanaenexa itsacuenejavayo atá, xua yabara auranë tsipae. Cristo tajumecovënëtsijavaveliacujinae, aeconoxae atá, ajunavijibia jitsipajë taexanaenexa Cristo pejitsipaecuenia daxitamatocabijavabelianexa. Bajarapacuenia jitsipajë taexanaponaenexa ébjaraponénexa. Bajaraponë tanetojitsipaecuenia abaxë taasaëtsapona-ponaepato mapanacuataje, tatëpaeepatotanexa atá, jitsipajë taexanaenexa xua pejamatabëcueneta daxitajivi yaiyataejitsia Cristo.²¹ Tasaëtsa ponaponaepato abaxë mapanacuataje, Cristo pejitsipaecuenia toexana-ponaponajë. Itsa pamatacabí tépaenajë, netoxanepanaejitsia mapanacuata tasaëtsaponaenexa matatoxenetsia. Tcipaji Cristo yajavaponaponaenajë athëbëtatsia.²² Tasaëtsaponaenexa Cristo tanetojitsipaecuenia. Itsiata apo yapëtaenë xua pepacuene jitsipajë.²³ Itsajavata bitso jitsipabiabjë

tatëpaejava taponaenexa Cristo pijanacuayabetsia. Bajaraxua bitso netoxanepanaejitsipa. ²⁴ Itsiata paxamë panenamatavenoname abaxë taponaenexa mapanacuata, patacayavenonaponaponaenexa. ²⁵ Yapëtaniji baja cajena abaxë taponaponaejava paxamënexa. Ponaponaenajë abaxë patacayavenonaenexa, panejamatabëcuenesaënexa panevajënaeyabelia, panejamatabëcuenebarëyanexanua panejumecovënëtsixae Cristo pelivaisi papecacapanepaenexa panijaneconivecua. ²⁶ Nexata pamatacabí Jesucristo neyavenonaena penaneconitsivi pejebabiabibovecua tapitsapaenexa, ponaponaenajë icatsia paxamëjavata. Nexata jamatabëcuenebarëyaya panevajunupaebianame itsamonaejavabelia pacuenia Jesucristo neyavenona tapitsapaenexa penaneconitsivi pejebabiabibovecua.

²⁷Pajinavanapare xaniavaetsia, pacuenia pexanialivaisi, Cristo pelivaisi, pacaitoroba. Nexata itsa pacataenatsi, apo pacatae atatsinua tsane, itsiata jitsipajë patacavénélivaisitaeponaejava najamatatabëcunejëpaeya panecasaëtsavanapaejava Cristo pelivaisi panejumecovënëtavanapaejava. Jitsipajë patacavénélivaisitaeponaejava asaëyata najamatatabëjëpaeya jivi panetsipaebavanapaejava Jesucristo pelivaisi jivi pecapanepaelivaisinexatsi. ²⁸Pëtsa pacujunavame pamonae pacaitoya. Dioso papecayavenonaexae, itsa apo pacujunavimë tsane itsamonaes pacabejiobiaexanae ata, nexata bajarapamonae jamatabëjumaitsi tsane: "Pexaniajailivaisi cajena bajarapamonae tsipaebapona. Tsipaji Dioso yavenonatsi. Nexata vaxaitsi bajarapamonae vajabejiobiaexanaexae, Dioso nacaverebiabiana," jamatabëjai tsane. Yapëtaenanua paxamë papecacapanepaejavanelia Dioso. ²⁹Cristo pejamatabëcuena pacatocopata bajaraponë panejumecovënëtsinexa. Itsiata baitsi jane apo pacatocopatsi ëbajaraponë panejumecovënëtsinexa. Pacatoyajavacopatanua baja cajena itsamonaes papecabejiobiaexanaenexa bajaraponë papijajivixaemë. ³⁰Pacuenia Cristo pijajivitonëxaenë itsamonaes nebejiobiaexanapona, bajara pijinia pacuenia paxamë ata itsamonaes pacabejiobiaexanaena. Pacuenia baja imata panetaneme itsamonaes tanabejiobiaexanaejava, bajarapacuenia abaxë tsiteca nebejiobiaexanapona pacuenia baja panevénélivaisitaneme.

Pacuenia Dioso pejumecovënëtsivi itavetatsi beayajamatatabëcuenevi penataeyaniva yabara pelivaisi

2 ¹Payapëtaneme rabaja mapacueneje. Jesucristo paneyajavajinavapanapaexae, panajamatatabëcuenesaëtame panejumecovënëtsijava. Payapëtaneme rabaja. Jesucristo papecasivaxae, pacajamatatabëcue-nebabata. Payapëtaneme rabaja Espíritu Santo papecatsijamatatabëe-caejava papecayajavaponaponaenexa. Payapëtaneme rabaja Jesucristo papecaitaxutsonia taeyabiabijava. ²Bajaraxuata nexata pacaitorobatsi mapacuenia panejinavanapaenexaje patacasivabarëyanexa. Najamatatabëcuenejëpaeya pajinavanapare. Najamatatabëcuenejëpaeya

namataenetsia panaasivamëre tsavanapae. Xua paexanaejitsiamë Dioso pejamatabëcuena, najamatabëcuenejëpaeya paexanavanapare.³ Pëtsa panatoexaname itsacuenejavayo ata, xua épaxamëneda pacatoxanepana. Biji rajane paexanare xua itsamonaenexa ata toxanepanatsi. Pëtsa paexanamenua itsacuenejavayo ata saya bepaayajamatabëcuenevimë papecataenexa itsamona. Biji rajane bevelajamatabëcuenevi panataeyabiabianame. Itsamona paxamëvecua ayajamatabëcuenevi pataeyabiabianame.⁴ Pëtsa panajamatabëxainabiabame épaxamë panenatojitsipaecuene. Biji rajane payajavanajamatabëxainabiabianame itsamona ata penatojitsipaecuene.

⁵ Pacuenia Jesucristo jamatabëcueneitsi, bajara pijinia paxamë ata pajamatabëcueneitsimëre. ⁶ Pacuenia Dioso jamatabëcueneitsi, bajara pijinia Jesucristo ata jamatabëcueneitsi. Itsiata baitsi jane Jesucristo apo jamatëjumaitsi: “Jitsipajë daxitajivi taneyaiyataenexa pacuenia taxa Dioso yaiyatanetsi,” apo jamatabëjai. ⁷ Bajaraponë picani ayajamatabëcuenenë. Paxa Dioso yajavaponapona athëbëtatsia. Itsiata itsa patsica mapanacuaya-betsicaje, naexana pacuenia vaxaitsi banaexanatsi mapanacuataje. Nexata paxa Dioso bepijajivitonë naexana, pacuenia Dioso itorobatsi pexanaenexa. ⁸ Bejivitonëcuenia itsa naexana, bevelajamatabëcuenenëcuenia ponapona. Paxa Dioso pitorobicueniatsi jumecovënëta. Pacuenia bitso pibisiacuene pexanaevi pijaneconi yabarajazabelia bacobematabarutatsi pebe-yaxuabinexatsi, bajara pijinia pacuenia Jesucristo ata nacopata cruzajavabelia pecobematabarutsinexatsi. ⁹ Bajaraxuata Dioso mëthëvetsina matacotatsi. Caponatsi athëbëabetsia peecaenexa paxa Diosojavatatsia, pebarëevetsinexatsi daxitacuene. ¹⁰ Nexata bajaraponë itsa vënëlivaisitae-natsi, pematabacabëta yaiyataeya tonubenaenatsi daxitajivi. Athëbëtatsia pejinavanapaevi, mapanacuapijivi ata, petëpaevimi ata, pematabacabëta yaiyataeya tonubenaenatsi. ¹¹ Nexata daxitajivi jumai tsane Jesucristo yabarajiva: “Jesucristo rabaja cajena pepo petuxanenë,” jai tsane. Nexata daxitajivi yapëtaena pacuenia paxa Dioso bitso ayajamatabëcuenenë.

**Pacuenia Dioso pejumecovënëtsivi pexaniajailivaisi
pejumecovënëtavanapaexae, bepecotia mapanacuataje yabarajalivaisi**

¹² Tajamona bitso patacaasivavi, pacuenia panejumecovënëtame pamatacabí pacatsipaebaponaponatsi Dioso pejumelivaisi, bajarapacuenia matatoxenetsia Dioso pajumecovënëtavanapare, aeconoxae xanë tajë pacavecuaponapona atatsi. Pacaejivimë canacujitsia cujunaviaya Dioso pajumecovënëre. Nexata épexaniacuene paexanavanapaename. Tspajji Dioso papecacapanepaevinexa. ¹³ Dioso rabaja pacajamatabëcuene-venona panejamatabëthëtovetsina jitsipaeya paneexanaenexa, pacuenia Dioso pacatojitsipa. Dioso pacajamatabëcuene caëjëpaeyaexananua paneexanaenexa bajarapacuene.

¹⁴Daxitacuene paexanavanapare pajamatabëcuenenatsipaebinejema. Pëtsa anaeya namataenetsia najumenotsia panabijatanemenua. ¹⁵Bajaratpacuenia itsa pajinavanapaename, nexata daxita paxamë aneconijibia jivi patsitajinavanapaename Dioso papexixaemë. Nexata mapancauapijivi pibisiacuene pexanaevi tuatuajéta pajinavanapae atamë tsane, itsajivi ata acuenobi tsane pibisiacuena papecabaracuaicuajainexa. Pacuenia pecotia itayota pitaquirijavata, bajara pijinia pacuenia paxamë ata paitsimë tsane. Bepapecotiamë tsane pexaniajailivaisi panejumecovënëtavanapaexae bajarapamonaejavata. ¹⁶Bepapecotiamë tsane xaniavaetsia itsa patsitajumecovënëtavanapaename bajarapamonaejavata pexaniajailivaisi, Jesucristo pelivaisi. Bajarapacuenia itsa patsitajumecovënëtavanapaename, pacasivabarëyatsi tsane pamatacabiciatsia Cristo patsianica. Bajarapacuenia pacasivabarëyatsi tsane tsipaji baja yapëtajenajë apo tanacuerertsijava asaëya tanacuenebijava paxamëjavata. ¹⁷Dioso pacasivabarëya panenajamatabëcuenerajutsixae Diosojavelia panetojinavanapaenexa bajaraponë papecatojitsipaecuenia. Itsamonaebeyaxuajitsia ata tsipae Cristo pelivaisi patacatsipaebixa, xanë itsiata nasivajamatabëcuenebarëyanë tsipae. Tsipaji Cristo pelivaisi bajarapacuenia patacatsipaebinexa, Dioso netocopata. Nexata daxita paxamë pacayajavajamatabëcuenebarëyatsi tsane. ¹⁸Bajarapacuenia paxamë ata pajamatabëcuenebarëyamëre tsavanapae. Paneyajavarëyamërenua tsavanapae.

Timoteobeje Epafroditobeje yabara pelivaisi

¹⁹Itsavajatuxanenë Jesús jitsipa, naxanitsiayojamatabëitorobajë Timoteo papecataenexalia. Pepatsicujinaerena, itsa pacavënëlivaisitae-natsi pacuenia pajinavanapame, nejamatabëcuenebarëyaya exanaejitsia. ²⁰Bajaraponë caenë nejamatabëcuenejëpa. Bajaraponë bitso pacasivana-jamatabëxaina xaniavaetsia panejinavanapaenexa. ²¹Daxita itsamonaebitsonejamatabëxaina xaniavaetsia panejinavanapaenexa. Apo sivanajamatabëxainae Jesucristo petonacuenebinexa. ²²Paxamë baja payapë-taneme pacuenia Timoteo pacatsitaponapona pexaniajamatabëcuenia. Pacuenia itsamonaebaxavenona, bajara pijinia pacuenia Timoteo neyavenona jivi tatsipaebaponaejava pexanialivaisi, Jesucristo pelivaisi. ²³Bajaraxuata jamatabëitorobajë Timoteo paxamëjavabelia papecataenexalia. Itsayapëtaenajë pacuenia nexanaejitsi pena-neconitsivi pejebabiabibota tananeconitsiaponaponaeva yabar, nexata bajaraxuacujinae pacatoitorobialiatsi Timoteo papecataenexalia. ²⁴Xanë jamatabëjumaitsinë paxamë yabar: “Itsadiso netojitsipaena xanë ata taponaenexa bajarabelia, nexata neyavenonaena bepijia taponaenexa tataenexalia Filipos tomarapijivi,” jamatabëjanë paxamë yabar.

²⁵Panetoitorobaremena rabaja vajabananë Epafroditopataneyavenonaenexamë bajarapacuenia tanamatavenonaeepatota. Nexata Jesucristo

patonajuanacuenebajébeje. Asaëyata panajuanacuenXanë jamatabëjumaitinë paxamë yabara: "Itsa Diosoebajébeje, Dioso apo pejumecovënëtsivi paneitsacueniababiabi atabeje. Nexata icatsia netsitaxanepana bajaraponë patacatoitorobinexalia.²⁶ Majotaje Epafroditio piavitanecujinae, jamatejema baja. Nexata aeconoxae bitso jamatabëpona paxamëjavabelia papecataenexa. Bitso jamatabëpona tsipaji yapëtane panevënëlivaisitajava pebitsojava piavitanecuene.²⁷ Xaniajai rabaja picani. Avitane petëpaejavabelianexa. Itsiata baitsi jane Dioso itaxutotsoniatanetsi. Xanë ata Dioso nitaxutotsoniatane. Tsipaji itsa nevecuatëpaejitsipa, xanë bitso najamatabëxainaеjitsipajë. Tsipaji penaneconitsivi pejebabiabibota taneetsixaе tanajamatabëxainaеjavata, nevecuatëpaejitsipa.²⁸ Bajaraxuata bitso jitsipajë bajaraponë patacatoitorobinexalia panetaenexa, nexata paxamë panejamatabëcuenabarëyanexa itsa pataneme icatsia bajaraponë. Nexata xanë ata paxamë yabara bevelia najamatabëxainaenajë.²⁹ Pacopiapitsian ame bajaraponë bitso jamatabëcuenabarëyaya Dioso pejamatabëcueneta vajabananëxae. Pamonaе jamatabëcuenetsi pacuenia bajaraponë jamatabëcuenetsi, payaiyataename.³⁰ Paxamë apo papatsi atamërena maberajje pataneyavenonaenexamë, itsiata panejamatabëcueneta bajaraponë panetoitorobaremna taneyavenonaenexa. Nexata bajaraponë neyavenonabiaba Cristo pijacuene tatonacuenebijava. Bajaraxuacujinae itsa avitane, imoxo picani petëpae.

Pacuenia jivi Dioso pejitsipaecuenia betojinavanapa yabara pelivaisi

3 ¹Tajamonaе, palivaisi capanepaeya pacatoyaquinatsi baja, bajarapalivaisi pasivajamatabëcuenabarëyamëre Cristo papijajivixaemë. Xanë apo pacasivacueranaetsi patacatooyaquinaenexa icatsia bajarapalivaisi. Tsipaji xanepana icatsia panejumetaenexa bajarapalivaisi. ²Panayajivitaema pijamatabëcuenebujevi, pamonaе beaviri pianaepanaevi. Tsipaji raja bajarapamonae apo aura pexanaejava yabara. Bajarapamonae jamatabëcuenenavëxaniabiaya jumaitsi tsabiabi Jesucristo pijajivjabelia: "Xanepana paxamë ata papecaperabëcaucubinexa judíovicuenia Dioso pepacuene papecacapanepaenexa panijaneconiveua," jai tsabiabi. ³Nacaperabëcaucutsi ata tsipae, vajanacaperabëcaucutsijava yabara, Dioso pexitxi apo nacaexanae tsipae. Vaxaitsi pepacuene vajanacacapanepaevinexa Diosojavabelia. Tsipaji vajamatabëëthëtojavavetsina najamatabëcuenecopatatsi Diosojavabelia vajanacacapanepaenexa. Jamatabëcuenabarëyatsi Jesucristo pijajivixaetsi. Yapëtanetsinua pacuenia Dioso apo nacacapanepae tsipae vajacuata vajaexanaejava pejamatabëcueneta. ⁴Itsajivi itsa caëjëpaejitsipatsi pijacuata penacapanepaenexa Diosojavabelia judíonëxae, Dioso petonacuenebijava yabara ata, nexata xanë ata necaëjëpaejitsipa tajacuata tanacapanepaenexa. ⁵Xanë picani mataitsinëje. Itsa baja xainajë ocho pamatacabibeje tanaexanaecujinae,

tajasalinaivicuenia neperabécaucuta. Baitsi neboupiperabécaucuta. Xanë raja tajasalinainëmi Israelpijinë. Benjamínpijinë pemomoxiyajuvënënë-në. Taxa judionë. Taena ata judiova. Xanë picani fariseonënë. Pacuenia fariseovi bitso jumecovënëta Dioso Moiséspijinëta penajumecopatsilivaisi, bajara pijinia pacuenia xanë ata itsinë. ⁶Daxita tajamatabécuenesaëta caasaënë tajumecovënëtsijava Dioso Moiséspijinëta penajumecopatsilivaisi. Jamatabécuenenavéxaniabajé tsaena bitso. Jesú斯 pelivaisi pejumecovënëtsivi yabara, jumaitsinë tsabiabi: “Dioso Moiséspijinëta penajumecopatsilivaisivecua saicayalivaisi jumecovënëta. Nexata bajarapamonaebeyejebatsi,” janë tsabiabi. Nexata Jesú斯 pijajivi bejobiaexanabiabajé. Dioso Moiséspijinëta penajumecopatsilivaisi, bitso xaniavaetsia jumecovënëtaponaponajë. Nexata itsajivi ata acuenebi pejumaitsijava xanë yabara: “Pablo xaniavaetsia apo jumecovënëtsi Dioso Moiséspijinëta penajumecopatsilivaisi,” pejaijava. ⁷Daxita bajarapalivaisi yabara xanë picani sivabaréyanë. “Itsa jumecovënëtsianajé bitso, netonamatamotsiana Diosojavabelia,” jamatabéjanë picani. Itsiata aeconoxae yapëtaniji daxita bajarapalivaisi piamatamobilivaisicuene. Tsipaji baja najamatabécuene copatajë Cristojavabelia tanevercuaajibiaexanaenexa tajaneconi. ⁸Aeconoxae baja yapëtaniji daxita bajarapalivaisi piamatamobilivaisicuene. Daxita bajarapalivaisivecua netonamatamota tayapëtaenexa xaniavaetsia tajatuxanenë Jesucristo. Jesucristo taneyajavaponaponaexae, nexata piamatamobilivaisi tajumecovënëtsijavami, copatajë baja. ⁹Dioso aneconijibia apo netae tajumecovënëtsixae Dioso Moiséspijinëta penajumecopatsilivaisi. Aeconoxae baja Dioso aneconijibia netane tsipaji najamatabécuene copatajë Jesucristojavabelia tanevercuaajibiaexanaenexa tajaneconi. ¹⁰Tavajén aeyabelia bitso jitsipajë daxitacuenevecua tayapëtaenexa pacuenia Cristo jamatabécueneitsi. Pasaëta Dioso matacotatsi Cristo petépaejavavecua, bajarapaasaë jitsipajë tayajavaponaponaenexa. Cristo pijajivitonëxaenë, jitsipajë xanë ata tanebejobiaexanaenexa, tatëpaenexa ata. ¹¹Tsipaji xanë ata copiaevetaponaponajë Dioso tanematacotsinexa tatëpaejavavecua.

**Pacuenia Pablo najamatabécuenesaëta xaniavaetsia
Cristo peyajavaponaponaenexa, pepatsinexa Dioso
pijanacuayabetsia, yabara pelivaisi**

¹²Xanë apo jamatabéjumaitsinë: “Daxita baja Dioso pejitsipaecuenia toexanajë. Nejamatabécuenecaeëjëpa baja tajumecovënëtsinexa pacuenia Dioso neto-jitsipa taexanaenexa,” apo jamatabéjanë. Itsiata tavajënaeyabelia tanejamatabécuene caëjëpaponaenexa, caasaënë tsaponaponae taexanaejava pacuenia Dioso neto-jitsipa. Jitsipajë bitso tajamatabécuenexanepanaejava tavajënaeyabelia pacuenia Dioso neto-jitsipa. Tsipaji bajarapacuene yabara Jesucristo nesivatépa. ¹³Tajamonaë, apo jamatabéjumaitsinë: “Xanë rabaja nejamatabécuene-caëjëpa Dioso tajumecovënëtsinexa pacuenia Dioso neto-jitsipa taexanaenexa,”

apo jamatabëjanë. Jume baja cajena. Mapacuenia najamatabëxainajëje. “Daxita xua exanajë Jesús pelivaisi tajumecovënëtsivajënaeya, nacofënëtajë baja,” jamatabëjanë. Najamatabëcuenesaëtajë xaniavaetsia tatoponaponaenexa Dioso. Pacuenia pebitsojinaenë pecujinaejinaejava penayacobijavata, nasaëta pepatsinexa petocaëjëtsivajabeliatsi, bajara pijinia pacuenia xanë ata najamatabëcuenesaëtajë xaniavaetsia tatoponaponaenexa Dioso. Tavajënaeyabelia najamatabëcuenesaëtajë taexanaenexa pacuenia Dioso netojitsipa. Bajarapacuenia najamatabëxainaponaponajë.¹⁴ Pacuenia pecujinaejinaenë nasisaëta penacanabinexa perajutsinexatsi premiovënëjava, bajara pijinia pacuenia najamatabëcuenesaëtajë. Najamatabëcuenesaëtajë xaniavaetsia tatoponaponaenexa Dioso tanerajutsinexa athëbëtatsia taxainaejavanexa tayajavaponaponaexae Jesucristo.

¹⁵ Daxita pamonae xaniavaetsia jumecovënëtavanapa Dioso, bajarapomonae ata benajamatabëcuenesaëtavanapa xaniavaetsia petojinavana-paenexa Dioso. Itsa abaxë paxamë saicaya itsajamatabëcuene paxainame, nexata Dioso pacayapëtaeyaexanaena saicaya abaxë itsajamatabëcuene panexainaеjava. ¹⁶ Nexata palivaisivajëto jumeyapëtanetsi pexaniajailivisi, bajarapalivaisi bejumecovënëtavanapatsi. Becaasaë tsavanapaetsinua vajavajënaeyabelia orijibia vajajumeyapëtaeponaenexa.

¹⁷Tajamonaе, pacuenia baja pacatsitaponaponatsi, bajara pijinia pacuenia paxamë ata pajinavanapare. Itsamonaе paxamëyajuvënëvi xaniavaetsia jinavanapa pacuenia pacatsitaponaponatsi. Bajarapamonae ata panaitaxutocaeve-tsianame paxamë ata xaniavaetsia panejinavanapaenexa pacuenia bajarapomonae jinavanapa. ¹⁸Ayaibtsaëtoxaneto paxamëyajuvënëvi apo jumecovënëtsi Jesucristo cruzata pesivatëpaejavatsi pecapanepaenexatsi. Bajarapamonae yabarapacatsipaeabatsi baja anijatonë. Itsiata icatsia aeconoxae yaitaxutonueya pacatsipaebianatsi. ¹⁹Mapanacuaje pecopiarucaematacabita, bajarapamonae Dioso verebiabianatsi. Tsipaji bitso jitsipa pijacuata penatojitsipaecuenia pexanavapaenexa. Piauracuene exanabiabi ata, jamatabëcuenenavëxaniabiaya jamatabëjumaitis tsabiabi: “Pexaniacuene bitso vaxaitsi exanavanapatsi,” jamatabëjai tsabiabi bajarapamonae. Ëmapanacuajipicuene saya sivanajamatabëxainabia-ba. ²⁰Vaxaitsi baja cajena jinavanapaenatsi Dioso pijanacuatsatsi. Bajaraxuata copiaevertavanapatsi vajatuxanenë Jesucristo pepatsijavatsica vajanacacapane-paenexa Dioso pijanacuayabetsia. ²¹Vajaperabëto vereverecaena. Itsiata vajatuxanenë Jesús nacaperabëitothianaena. Nexata pacuenia bajaraponë perabëitsi athëbëtatsia, bajara vaxaitsi ata perabëitsitsi tsane. Nexata pasaëta Jesús caëjë-patsi pitorobinexa daxitacuene, bajarapasaëta nacaperabëitothianaena.

Pacuenia vaxaitsi besivabarëyatsi tsabiabi vajatuxanenë Jesucristo yabara pelivaisi

4 ¹Tajamonaе bitso patacaasivavi, pacaitaxanatsi. Bitso jamatabëpacatanetsi. Bitso pacasivajamatabëcuenebarëyatsi. Tsipaji xaniavaetsia

pajumecovënëtavanapame Jesùs pelivaisi pacuenia baja pacatsipaebatsi. Pajamatabëcuenesaëmëre tsavanapae pacopatsinejevamë panejumecovë-nëtsijava Jesùs pelivaisi.

² Papetirivamëbeje, Evodia Síntique, paxamëbeje pacatoyaquinatsibe-je patacaitavetsinexabeje mapacueniae. Pëtsa baja icatsia pematatsënëa namataenetsia panajumeanaenotamebeje. Panajamatabëcuenejëparebeje Jesùs pelivaisi panejumecovënëtsivaxaabeje. ³ Xamë ata xaniavaetsia taneyavenonaenëmë Dioso pijacuene tanacuenebijava, catoyaquinatsi. Jitsipajë neyavenonaenexa bajarapapetirivabeje, penabarajamatabëcue-nexanepanaenexabeje namataenetsia icatsia penajumeanaenotsiyani-vabeje. Bajarapovabeje bitso neyavenonabeje tatsipaebijava itsamonaejavelia pexaniajailivaisi pecapanepaelivaisinexatsi Diosojavelia. Bajarapacuenia Clemente ata neyavenona. Itsamonaes ata patanajuanacue-nebivi, bajarapacuenia neyavenona. Daxita baja bajarapamonae vënëru-bena Dioso pijabaxutota, itsa pabaxutota vënëyaquinarubatsi pamonae pexainaevinexa matacabí apo peverevererecaejava.

⁴ Jesùs pelivaisi panejumecovënëtsivixae, pajamatabëcuenebarëyamë-re daxitamatocabijavelianexa. Icatsia pematatsënëa pacajumaitsitsi. iPajamatabëcuenebarëyamëre tsavanapae! ⁵ Jamatabëcuenexanepanaeya xaniavaetsia pajinavanapaenname daxitajivi papecajamatabëcuenezapëtae-nexa. Tsipaji rabaja vajatuxanenë imoxoyo pevajënae pepatsinexatsica.

⁶ Pëtsa pajamatabëcuenebëjamë itsacuenejavayo ata yaba-ra. Biji rajane pavajëre Diosojavelia daxitacuenejavanë yabara. Pexaniajamatabëcuenenua parajutabiabare Dioso papecayavenonaejavänë yabara. ⁷ Nexata Dioso pacajamatabëjemayaexanaena panejamatabëcue-nebëjaiyaniva. Pexaniacuene bitso bajarapajamatabëcuene. Dioso itsa nacajamatejemayaexana vajajamatabëcuenebëjaiyaniva, itsiata apo yapë-taetsi pacuenia nacajamatejemayaexana vajajamatabëcuenebëjaiyaniva. Dioso itsa pacajamatejemayaexanaena panejamatabëcuenebëjaiyaniva, nexata apo pajamatabëcuenebëjamë tsane. Jesucristo itsa pajumecovë-nëtavanapame, daxitacuene yabara panenajamatabëxainaejava atavecua Dioso pacaevertsiana.

Pacuenia benajamatabëxainabiabatsi ëpexaniacuene yabara pelivaisi

⁸ Tajamonaes, pecotocaevilivaisi pacatoyaquinatsi mapacue-niaje. Panajamatabëxainabiabare ëpexaniajailivaisi yabara.

Panajamatabëxainabiabarenua panenayaiyataecuene ata yabara.

Panajamatabëxainabiabarenua xua xanepana paneexananavanapaenexa.

Panajamatabëxainabiabarenua Dioso papecajamatabëcuene barëyaya-e-xanaenexa. Panajamatabëxainabiabarenua xua jivi baracuaicuajaijitsia pexaniacuenia. Panajamatabëxainabiabarenua daxita xua pexaniacuene.

Panajamatabëxainabiabarenua xua yabara Dioso pacabarëyataejitsia.

⁹Daxita pacuenia pacatsipaebatsi, pacuenia pacatsitaponaponatsinua, bajarapacuenia paexanavanapare. Nexata Dioso, ponë pacajamatejema-yaexanaejitsia panejamatabécueñebejaiyaniva, pacayavaponaponaena.

**Pacuenia Filipos tomrapijivi ofrenda
tojebabiabatsi Pablonexa yabara pelivaisi**

¹⁰Vajatuxanenë bitso nejamatabécueñebaréyayaexana. Tsipaji baja paxamë icatsia panesivanajamatbabéxainame pataneyavenonaenexamë. Nexata baja icatsia ofrenda panetoitorobaremena. Bajayajebi apo panetoitorobi atamë ofrenda, itsiata paxamë yabara apo jamatabéjumaitsinë: “Apo jitsipae raeta icatsia taneyavenonaenexa bajarapamonae,” apo jamatabéjanë. Jume cajena. Yapétaniji pacuenia picani jamatabépanetoitorobi atamë ofrenda pataneyavenonaenexamë, itsiata apo pacacuenecaëjépae patanetoitorobinexamë. ¹¹Apo pacatoyaquinaetsi mapacueniaje ofrenda patanetoitorobivajénaeyamë bitso tanamatavenonaexae itsacuenejavayo. Dioso tanejamatejemayaexanaexae tajamatbabécueñebejaiyaniva daxitacuene yabara, sivajamatbabécueñebaréyanë saya xuayovajëto xainajë. ¹²Yapétaniji pacuenia ponaponajë, pamatacabí tsiquirijavayo xainae atanë. Yapétanijinua pacuenia ponaponajë pamatacabí ayajava xainajë. Yapétanijinua pacuenia jamatabécueñebaréyanëjitsia daxitamatocabijavabelianexa. Nexata itsa xainajë daxita tanamatavenonaejavaxi, baréyanë. Apo xainae atanë itsacuenejavayo ata, itsiata baréyanë tsabiabi. ¹³Neja matabécuenecaëjépa tanajamatbabécueñesaëtsinexa daxitacuene yabara. Tsipaji Cristo pesaëta nejamatabécuenecaëjépaeyaexana. ¹⁴Itsíata baitsi jane paxamë pexaniacuene bitso panetoexaname itsa panetoitorobaremena bajarapaofrenda bitso tanamatavenonaejavata.

¹⁵Payapétaneme rabaja mapacueneje. Pamatacabí copiaya tsipaebanajetarucajë jivi pecapanepaelivaisinexatsi Macedonia nacuajava, paxamë paFilipos tomrapijivimë panajanacuavecua itsa ponajë, paxamë panerajutame ofrenda pataneyavenonaenexamë. Itsatomarapijivi, Dioso pejumecovénëtsivi ata, apo nerajutsi ofrenda bajarapacuenia taneyavenonaenexa. Ëpaxamë itsiata paneyavenoname. ¹⁶Nexata bajaraxuacujinae, itsa abaxë ponaponajë Tesalónica tomarata, panetoitorobabiabame icatsia ofrenda anijatonë tanamatavenonabiabijavata. ¹⁷Sivabaréyanë tsabiabi itsa panetoitorobabiabame bajarapacuenia. Itsiata apo sivabaréyanë tsabiabi tanetoxanepanaexae bajarapacuenia pataneyavenonaejavamë. Jume baja cajena. Biji rajane sivabaréyanë tsabiabi bajarapacuenia pataneyavenonaejavamë. Tsipaji juya paxainaejitsiamë Diosojavabelia papecarajutsijavanexa athébëtatsia. ¹⁸Nexata pitajë daxita patanetoitorobijavamë Epafroditota. Xainajë baja nexata bitso ayajava, tanamatavenonaejava matatoxenetsia. Xua panetoitorobame ofrendacuenia, tsitapexaniacuene-tsi Dioso. Bajaraxua Dioso sivajamatbabécueñebaréya. ¹⁹TajaDioso bitso

pexainaenë. Nexata pacarajutsiana daxita pacuenia panamatavenoname. Bajara pijinia pacuenia ayaijava Dioso pacarajutsiana Jesucristojavelia xaniavaetsia panenajamatabëcuenecopatsixae. ²⁰ iVaxa Dioso ayaijamata-bëcuenenë daxitamatacabijavabelianexa! Bajara itsi tsane.

**Pacuenia Pablo tonajumeitoroba Dioso pejumecovënëtsivi
pebajacobinexatsi yabara pelivaisi**

²¹ Nebajacobiana paxamëjavata daxita Jesús pelivaisi pejumecovënëtsivi, pamonae Dioso pijajivi. Dioso pijajivi, pamonae xanëjavata jinavanapa, pacabajacobalia. ²² Daxita Dioso pijajivi, mapatomarataje pejinavanapaevi, pacabajacobalia. Romanonacua pepo pevetsinë pijabota penacuenebivi atá bitso pacabajacobalia.

²³ Pacatovajëtabiabatsi Diosojavelia, vajatuxanenë Jesucristo papecayavenonabiabinexa. Bajara itsi tsane.